



僕之歸樵湖上至寂寥也乃公儼然綸巾薜裳而相  
臨之月下分題雲霞共麗花前作劇魚鳥爭趨至于  
片語相雕千載同奮寸心披豁彼此獨照矣別時辱  
公自箋而萃之群采且又以箴遺我幅幅而情卽幅  
幅而感也排律一章惜別二章每一歌之便生黯慘  
攬芳草以增愁把桂枝而嘆息公之念我與我之念  
公何殊哉洲上草堂得子培嘗不令穢第白鷗怨侶  
青蘿失色寒江聽雨徒勤蕙魚一抵薊門便與案牘  
作役稍得王吳二子一破之春中聞公渡姑孰訪陳

使君使君竒興近復如何澄江憶謝采石懷李飛翰  
雄篇當令今古並峙矣車馬已定雅思稍整十記諸  
牋行當致之間讀鄉中集令人內悒選梓恐未易談  
郭集已得不公春來佳句可使遠人得聞乎倅歸寸  
楮代謝北翔有翼唯長者諒之

又

春暮遣奴持尺疏歸謝而訓術君至則我公旣以書  
來開函讀涉句便令悵情卒牋又懽然慰喜也公之  
讀我書想同之耳五月子培報家園大有麥秋則北

定得豐穫及六月得家大人報又駭夏潦公之歲  
計竟復何如念我百花洲上蕩然鷗鷺遊也遠心  
萬折至數十百萬而江北諸郡復

爲侵歲暴吏所苦天下事大可憂豈僅桑梓休惕哉  
鄙人素厭世氛且頻歲烟霞野性益篤一行作吏萬  
苦攻人每晨出驅馬經荒園草棘中蟋蟀振響白露  
拂袖則恍然憶我洲前秋色黯然內銷不知爲心也  
公將何以謀之我公高卧紫雲當自不廢吟弄竒篇  
俊語可使遠人得一握覩乎近與王吳二子徵逐稍

有數語第付草胥侍已亂錯簾笥中行當手理之寄  
請也訓術君歸附此布其區區時坐省中治牘從羣  
胥旁歆斜書之公閒居又時時有間人來當頻治一  
書報我諸牋十記歲暮爲期也

又

去冬再奉手書時以吏役日夜急不得具一言往報  
心則甚矣春事方新楚天日遠湖上主人人生事如何  
孤艇白蘋明月萬里懷人寄遠鄙人得分一二乎鄙  
人自秋九月以至春正月省棲也耳目心志俱兀兀

牘牘中及歸邸休沐則上計諸君接而苦之束帶報  
刺日紛紛道上時念宿采則孟氏所謂予旣已忘之  
矣諸箋十記歲暮爲期者何以酬斯語乎每一念至  
輒用太息我公高棲湖上執筆臨池稚子候門落花  
蒲砌則奚啻壺嶠哉公得之毋輕棄之也海丈歸布  
此代訊其時事自詳之矣有便惠我德音

報陸長庚

溪上結廬幽棲咫尺頻辱進艇叩我石門對落花之  
續紛坐明月以嘆息玄言獨契華藻時抽取足寸心

便擬千古秋夜深談河山頓隔一水盈盈竟阻握手  
是造物忌之矣既渡淮稍得謝客乃索麓中佳序竦  
意而讀焉一讀十起頓足長嘆自束髮內交茫茫日  
遠足下以數語紀掇往跡恍然昔驩意氣不殊容髮  
漸改因之傷念及讀洲上語則又洒然快心足慰離  
索矣一抵燕便作案牘中人群吏環趨如對魍魎百  
苦攻人肌骨欲痛此狀不能縷報恐百花樵客聞而  
咲之足下龍卧滄江雲深霧遠丹經在握白日難欺  
間以其餘綜緝昔采俾左馬曹杜相顧失色吾人之

上計也頃者春水漸深魚蝦可網足下箕踞獨嚼  
髮長吟亦有一念以及遠人乎奈何其亡妬也評歸  
寸楮申謝時散客燒燭目且病命吏書之北翔有便  
延遲報音

又

暮春一爲緘報便又深秋望足下片楮心目斷絕豈  
忘之或遂棄之也家大人書報六月大雨至使鷺鷗  
棲我芙蓉館中則足下南擊當不能拒波浪浸几矣  
細君諸郎君豈安水居卽水中拾一二穗穰歲計何

侍大爲足下稱苦足下旣苦窮乃禹君又竟長逝又何也往歲僕走別禹君則禹君尚挾刺訪客僕意旣能挾刺訪客又安有病卽病亡慮也不謂遂已夏中方對客殮聞之輒棄食泣數行下此君負奇使氣口期期又好文致其詞此俱可書足下宜書書成報我當不使此君遂泯也其孤嫠抱影何恃爲命足下及伯章諸君負高義當後已而先之檢笥中得精直二金以道遠不能買隻雞斗酒而哭之足下其爲我遺其孤時夜直省中秉燭書此朋好星踈存歿關念投筆長歎不能爲心想足下同之耳

報李伯章

返耕湖上得時時從足下游明月携卮寒花指珮酒酣作賦四壁琳瑯風雨笑談中夜攘臂薜蘿搖颯鷗鷺驚呼此人生之極驩也幽思方殷離歌忽起足下念我召二三同志爲別草堂太夫人手調羹而食之贈言章慷慨莽愴如河梁語卽千載一情也孟城枉別乃百里特駕此情真與江流比遠鄙人將涓滴而歲之雨雪渡淮離情慘黯長路驅馳獻春始得問

舍躍馬投刺束帶理牘外煩中快孤坐含嗟洲上百  
花繽紛春色胡爲平來哉鴻鴈未稀尺書難緘乃辱  
飛翰雲墜握之嘆息足下偉才淵識湛于與華高步  
藝林以快天下耳目秋風得意何俟筮決乎鄙人將  
抗首矯足以待伴歸寸楮代謝江山悠邈馳念甚切  
北翔有翼莫靳嗣音

又

與足下別湖上而來日月長遠矣迺僅得一書問足  
下卽足下亦僅以一書來旣以計吏之役日驅手足

耳目以從之卽足下巖棲者亦或參差羽翼之便卽  
兩有念其誰違焉每一軫情輒用太息秋間日埃佳  
音復爾報屈何哉天意乎抱璞而泣昔者甚之以觀  
于近事亡怪其然已第其璞者終售且受上賞則足  
下又何慮焉太夫人起居無恙郎君日駸駸有凌雲  
氣足下俯仰爲心其樂如何鄙人別老母而北且與  
家君六年別也今又不能使之不萬里遊又自顧鄙  
人之身子矣則益嘆足下難耳舍弟罷歸書來頗憤  
尚幸得從長者游是用釋然於鄙衷足下向與僕言

宗方城尺牘卷六  
甚有念於漢魏夫詩至漢魏上矣李杜稱聖於選則  
視二代焉既善選矣則律亡難者猶探源而可必  
之委也別來有述一一教我叔氏歸已附一言以謝  
足下之錫言于家大人者更言之以見鄙悰其示報  
言慰其杼軸

報吳峻伯

自王吳諸子去國耳目久廢得足下再至爲我起之  
握手以來無間日夕停盃展翰投筆高歌金石琳瑯  
紛然四座奇句險語驚絕今古萬象爭趨三才失色

風雅以還鮮見其儔矣造物忌盛鄙夫當之故人憐  
我時時召我爲別偃蹇流落之人無所比數然而神  
遊八極心雄千古此足下所知即使重之放逐愈益  
助我長往耳將發之夕寸心欲裂展筆數十韻皆從  
涕泪中來他人讀之靡不悲絕况我兩人哉花下停  
觴便成萬里含悽東馳滿目搖落回睇金莖白雲障  
之數日卽聞東魯之命輒爲慰喜非一學椽便足爲  
足下重得假此聚首廣陵天目之間殊一大快耳刻  
下解纜吏歸授數語往謝足下旣出助甫益孤其將



謂何祈爲斯道自愛臨楮于邑

又

自與足下握別紫薇而南也日遲足下廣陵消息斷  
絕乃遂赴子與華陽之約然未嘗不談足下高雅至  
惆悵罷酒也足下停車泰岱覲周孔之故墟采管晏  
之遺事且得近携王李遠睇蓬渤壯遊哉鄙人以往  
歲十月入閩卽厓山海之役夏中負矢抱關凡兩越  
月不休衙矣今且護蒼梧軍三千以歸足下視鄙人  
何人哉而今乃若是鄙人卽非忘情人世者顧覩此

心老不勝其身稍過計吏之期則題尺疏上千

乞湖上扁舟以去二三子其坐日觀之峯相與  
笑醉千日作千百佳語因之短筇五岳不返矣足下  
以爲斯事如何折腰奉懷數言聊以代面

報余德甫

僕之登釣臺而南也問足下方視牘天台咫尺缺觀  
固歎哉足下何日復之長安昔者素衣今復何似知  
五陵氛垢不能上足下衣袍也之予沉淪時時爲人  
誦之足下勉之矣子與入燕夜談時倘念二三子萍

散也得無長吁罷酒乎僕之狀子與盈  
足下毋須問之恐益令足下嘆也便訊起居歲寒自愛

又

郵中累得書卽不面差慰之矣相違兩月日夜驅兩  
眼讀腐儒語其苦當以日作歲也足下對楚囚障姜  
公至卽脫之日坐隱床吟矣拾遺語何似奴輩有外  
闕者牽縛而鞭之昨入武夷二日游大佳今古談者  
羨矣再數日可延平再十五日可得面足下昨聞  
武夷至乃令心日日南也郎君大長進歸時有二

三子可讀者付之

報憚按察

鄉者幸從足下西署遊也則時時教之此其情深至  
矣及足下擁旄西驚僕亦負瘳南歸關川悠隔尺書  
難報祇以長嘆足下不棄惠然幸以書來握讀增感  
足下秉鉞治楚聲稱炳蔚私心快之興作繁苦犁然  
底績非足下貞憲節冗公私不幾困乎卽非足下之  
大者亦徵之矣冗中口授數語往報秋氣漸搖落唯  
爲國事加愛不勝大願

報李干鱗

與足下握別莫甚矣既別之春聞足下出刺尺書在袖竟阻北羽諸子書來則詳道足下爲郡事抵燕見王吳二生日夕攘臂獨顧足下在遠茫然心折顧足下不離數子語也元美日謂使來已而使果來似函發紙歡喜無量寄贈三詩七言更絕一字一嘆上夜色樓臺雪萬象卽王中丞雨中春樹何加焉僕獲之千古生色太行諸篇奇鬱悲壯雄視今古卽遺集中未得多觀贈懷諸篇鏗鏗金石統之難繼

矣憶昔五子結盟義掩白日風波中起羽翼相垂謝榛以白髮負心梁生以青髻長往俯仰人事但可悲嘆吳生亡賴耳目縱橫意常駕僕僕髮短心長頗得意于此生此生矯厲非僕當之幾負矣僕常有言丈夫挺身斯道便當宰割中原建置列辟英雄四起並奮角力則亦七國之秦三國之魏決不甘心燕梁吳蜀鄙偷侵削也足下以爲何如謝生耄至負足下路人罵之讀絕榛書榛之羞萬世矣長篇十絕卽當綴報使往短楮申臆兼致謝于下執事太行在目悵矣

神馳

又

此地去足下所治郡咫尺數百里又長安使者日西南馳也乃不能時奉一書問足下卽足下亦不時以書來顧兩心相照矣眼中舊侶漸稀時從吳王二子游則口足下輒終其酒二子各擁精兵格鬪僕時以孤騎馳而却之西睨邢臺浮雲動色吾輩倘不公實中原之禍未已也足下其將謂何徐生且至足下又將有事上都吾五人者再得聚首長安易水重寒矣

肖甫使君去附此一問歲寒搖落行矣自愛

又

秋來不得足下一紙甚恨及書來乃又爽然懽喜也哭梁詩精絕所謂風雷不可聞者神來哉神來哉懷諸子僕句更奇吳生乃以足下後僕于生遂爲信抑恐足下不然也足下諸體各極至七言者高雅奇秀早絕今古更百千萬世愈益難耳而僕近頗得意茲塗雖不得仰同足下蓋亦庶幾焉聊寄一二足下讀之以爲如何徐生再來頗爲吳生所苦要之皆下壁

中人也握手不遠聊布區區歲寒加愛

又

足下東遊長安則携二三子時時辱焉一觴一嘯星  
河倒流天忌其盛一朝而去兩生已乃吳生罷爲從  
事徐生且以使事並吳生南僕孤立矣明卿謫且更  
得志日驅徐生醉我邸舍中而王郎亦時時以郵書  
來獨不得足下一書爲恨乃使者則儼然函書采而  
臨之手自啟函讀泪滢滢下也太夫人起屈無恙幸  
足下爲郡筭亡尺帛有如一日振衣去則太夫人

何賴焉足下之念太夫人深也又不欲以一郡爲太  
夫人憂則去任誠難矣足下在遠時議稍非所爲王  
生抱深慮幸有司馬公持之獨僕者慮甚王生又以  
其身日當群目也又安得云巨源亡恙乎來詩八章  
神才奇秀意興慷慨天地間安得此語讀之亡惟今  
日窮也鄙言二帙辱足下有至言凡所點綴我者欣  
然有當於鄙心知我者鮑子也即使僕裂冠毀冕放  
之江南而沉之復何恨哉二生欲會足下于漳水之  
南其所語足下者卽僕語不殊也使者回騎聊題短

楮往報目兩日來病甚稍思則火焱焱起凡所贈足  
下者尚錯麓草中稍不病卽手書之付二子來也前  
所辱從者貺勤矣又何解衣衣我乎足下善飯

又

使者歸自司馬帳中乃竟未面元美元美前移書於  
僕爲其尊君索言於足下足下遣使時曾已有言乎  
有則命僕書之金軸在僕也南檄日至島寇旣已寇  
揚唐觀隋樓俱燼則僕之室廬枌梓可知已日謀歸  
謀卽歸安棲乎且太夫人者在堂僅一弱弟何恃僕

之方寸亂矣足下雖困得借寸祿俱太夫人朝夕無  
恙甚幸且足下亦何所不得也使者西敬爲致候日  
下赫暑足下自愛

又

吳吏至奉五月四日手書知足下會二子於清源道  
中二日始別又讀所爲贈明卿諸詩卽此語豈不令  
鬼神妬也吳生之謫固足下波及矣王郎昨至碧雲  
召我我不得出邀會于白雲觀中握手悲歎恍若隔  
世其所不諧於除目者其說深也我輩他日當不減

吳徐卿差薄耳日望足下續書不得乃先得手書大  
慰南檄日急群夷無狀乃燼我揚百花洲上鷺鷥薜  
蘿恐爲戈鋌所苦矣卽去安歸乎太夫人亡恙郎君  
日有文且蔡姬日奉卮飲帳中也足下自愛

又

使者來讀十二體詩怒髮指冠兩君何得乃爾是夜  
命楚姬奉卮展楮章章綴之星辰亂落題曰獨酌卒  
不使兩生獨擅千載也元美遺僕書謂僕當決漳河  
灌襄國欣然有當於鄙心太行又爲足下所苦今西

面秦則二華更復生愁日者地拆山裂黃何人立得  
非足下消息先傳乎僕當爲足下賦太行二華兩篇  
以報之恐風電起輿中驚恐使者使者且留先馳一  
騎往報足下當展觀桑梓則欲遲足下西湖之上能  
爲我迂轡乎采消之辱吾已命楚姬佩之顧何以報  
蔡夫人也

又

目鄙人去之悶悶去秦萬里亡論尺疏難題卽作夢  
思亦荒荒汶汶迷不識二華峰嶂也日覩佳牘知有

代足下者乃足下遂謝病去則投牘而起太息彌日  
僕故有去志聞足下去卽起還內誠婦理裝會島寇  
急日夜負戈逐寇不得請然此心已落海岱間矣足  
下歸携王郎登日觀坐天門東闕滄渤南眺閩楚悵  
仙人之後期憐逐臣之未返則蕭然有風雨之心哉  
明卿日卧白鹿不大落莫子與視郡戎馬者半矣鄙  
人明春幸不罷卽亦上書自罷三四月間定得與足  
下握手長嘯醉蔡夫人酒耳曾君以徵兵入齊敬謁  
足下其歸也請東秦草遺我向所贈足下二華之篇

不可讀則已可讀則足下何能忘情於武夷哉太夫  
人公子亡恙謹再拜以問

報王元美

昨至淮則江使君持足下書來僕發書讀輒淚數行  
下是夜寢復起徬徨行無所寄其悵恨已歸而揚州  
人送足下至江南者復持足下書來敬問足下起居  
亡恙讀書中語知足下以不得僕書爲恨顧僕卽欲  
裁一書問足下又何可得也是日謝客讀足下詩僕  
與足下別僅數月耳足下詩至百章亡論不減長安



時語而格力音調精工顧反過之廣五子者取類甚  
當而詩甚精顧五子者一何厚幸也於上虞生三致  
意焉有味哉有味哉七言者雄整五言者精麗要之  
不離乎神氣非敢謾足下亦足下所自知也僕七月  
與足下別數日卽病病甚遂上書于麟子與強僕起  
僕不起行時三子夜携酒視我抵舍中惟足下不在  
相顧動顏色明日遂別諸子行計時謂至淮得足下  
一會至淮足下已去纔四五日耳一歸草堂父老故  
舊日相過問長安事殊困一爲好語謝之則又相視

而嘻謂無故人情昔所抱痾以此愈益之矣行將迤  
草澤中略理芝朮俟稍稍善飯則欲問醫江南登虎  
丘而召足下尊君東伐奏凱有期曾無一言以及節  
鉞甚恨甚恨斯道寥寥上下千載足下自愛小詩數  
章用當面請

又

三月譯書草草不盡後數日聞海寇寇吳中太倉急  
僕披衣中夜立爲足下徬徨行屢遣奴往訊奴懼不  
敢問舟未嘗不對客欷歔也昨護戎回知吳中大定

便持手書又至大慰新詩佳帛厚我厚我進使者問  
知足下戒期還朝郵書已去來諭乃欲僕一會者甚  
厚念也謹勅小奴遲君江滸聞足下已納吳姬復有  
廣陵之娉向詩曾聽玉人簫者真聽之矣君當重謝  
我詩識也而廣陵人乃顧不得聽焉大恨大恨

又

既別凡兩得手書及詩二幅西山詩竒古可並鱗  
新絕竒甚矣則靡千古走之足下北僅旬耳目日駭  
吳遂罷給事爲丞猶丞焉尚得獲其二婦糊口不然

者立枯耳僕日夜求吳不得昨已移書舍弟緝我笑  
渠卽得與吳並南尚及大醉花下徐使江南日者掌  
曹大負其素 邢州君謀大不諧僕自謂負此子則  
散髮入山僕負李終不負僕也我兄弟三四人當俱  
不能殊吳獨足下以司馬公故或什一可脫洛憲極  
力于劉劉意已甚已竟亢獲之則足下奈何司馬公  
移書于僕意不獲前請則從其常者但在齊洛之間  
恐非所以處足下新銓目攝僕者數矣卽言之亡益  
僕負李又負足下然使僕當是時而能不負二子則

僕之辱二子者更大也日與諸子別蘭若泪洒洒不休足下怪之乃徵之矣僕卽得逐吳生轅則請足下移節于通爲末夜語吾三人聯卮浮白者恐遂難數也數時不欲握筆聊題短楮往報足下其自愛慰其區區

又

使來再辱書言言泪也是夜與徐生把讀吳生邸舍中又讀二生書黯然相照已乃命酒酒酣起舞且歌且泣索筆賦詩各得一章以報足下乃更相與大醉

而去吳生自謫日過我兩生醅肴幾盡子與卽不以謫且得並吳生南獨僕抱憤孤棲日對豺豹忍之不堪避之不能其視晝宵永于春秋矣足下去三子覲楚囚且重愁交錯其心不得見三子一語大爲足下稱苦顧不若僕心甚也見贈一章慘淡難讀味懷群什奇鬱悲慨並軫離騷我輩邁此險畏顧于斯道深矣二子將南足下又遠峰目頻睨娥眉難毀薜蘿塵念冠冕成仙躑躅四顧我勞如何使歸口授往報郵書毋惜頻不任延結

又

鄉者與足下別至悲也卽夜聚兩生解之今兩生乃相繼去矣更悲更亡以解及使來奉札乃又爽然若足下爲我解兩生悲也諸品之惠念我念我見懷一章慘然難目酒狂詩態總爲諸君頓減耳若畏名而除豈稱鄙人且外此二者更復何名乎夷齊賦幽遠奇鬱大類騷經七言一幅雄渾卓絕如千峯北斷祈連色峯排紫劍插胡天當與崆峒盤山並峙矣足下窮悲出塞乃更自雄於文卽使放逐足下江南者又

當何如僕不能自必其必足下無恙請以身質焉明卿六日南子與行乃在十二日竟天其子灑淚而去僕一病幾作未別近復稍稍健食然日遊諸衆人不得措一語出則不知所之以此憤憤眠耳使者歸速草草具復其奉贈諸篇病思稍起卽爲之自愛不悉

又

先數日于鱗遺我十二體詩讀之血氣俱動不意二君相逢作此奇事及使來又讀佳篇則章章甚也直須決滄海黃河波濤人立令足下不得東于鱗不得

西始爲快耳僕卽不得從兩君遊亦賦十二體命曰  
獨酌詩成舉白命美人歌之不減兩君並卮也于鱗  
竟得代靳入秦卽吾黨不假此始重顧此物非吾黨  
得不可耳足下旣已完牘則除書當繼李而下二君  
且得漫遊獨使僕折腰群貴大無佳思足下何以教  
之

又

僕聞古者有行遠則其與游咸有贈貽以結末好足  
下被繡擁旄提兵千里其爲故人光寵甚厚不可亡

贈夫足下所督戎者故齊地也其俗慄悍猾賊椎埋  
作姦群邪敷澤譚王道者病之足下往矣得以憲章  
從事取象于物惟豸性爲能觸邪故贈君豸衣一襲  
夫群邪所自邪也亦自上之約束爲之不束之而遽  
收之是謂不教而殺非聖謨所貴君子之束人也必  
先自束其身故贈君腰帶一束自束束人矣猶有不  
若者則付之三尺以彰國威以著足下之明信故贈  
君古劍一口明有豺豹幽有魍魎無不靡之矣此數  
物者不足以當足下顧於鄙人之心抱區區焉敢再

守方城片卷六  
拜以獻足下惟足下圖之

又

日夜遲足下報章及使來則足下乃以絨金遺我卽感足下之愛顧不及一語深也足下豈爲我靳一語或以庭懽奪之上東門時得一歌之未遲也日所云某某者所謂異方之樂令人切怛蓋悲之非喜之也上蔡張君九一其人大奇昨讀我古劍二華篇遂作數十奇語令人留目晚得斯人差慰寂寥渠知足下取道東城約我聯騎出訪足下須有以待之連夕爲

諸子彊去作餞酒間所得數幅足下讀之訪足下東城時意欲與足下刻燭作數百佳語始別第恐別有纓弁者來奈何鄙人湖上雜言二十首足下昔曾見否張君乃能爲我和之茲寄覽爲渠作贊使者立趣短題往謝餘悰千萬統俟握手

又

冬間得足下一書知東事甚悉使者竟不至未有以報僕已逐爲閩吏矣僕遂不難拂衣第以大江以南天台武夷素塵意想者亦何可不目倘有餐霞茹芝

者乎卽脫屣而逝耳昨會太宰公稱足下非謂一豸  
袍慮也行間辱尊公賜訊無惠之夫廩愧負長者幸  
爲我謝焉今已放舟南下秋中方得渡江足下向負  
我詩今武夷者亦何辭也川塗逾遠音告頗艱願爲  
斯道自愛于鱗處倘有便札其致區區冗極不盡鄙  
悰東望于邑

又

鄙人發京時留一書數詩史鴻臚轉報當不致作殷  
生狀也方渡淮島夷環至自戈戟中一覲老母卽日

夜從諸父老負矢石坐睨睥而賊從楊寇郵已又寇  
寶應縱火燒千萬家風烟亘天連十日不滅孤城咫  
尺如坐甕中此其抱怛怛怔怔難制矣賊幸大掠徑  
東方問枕簟而健兒乃又持足下手書來啟函大笑  
樂已又讀放歌行辟則大華諸山突起几席蛟龍大  
呼風雨驟至非鄙人當之幾至顛倒足下別後乃作  
如此奇恠而感懷諸篇悲壯慷慨一言一淚使後世  
讀之其謂此時何也塗聞北部警甚爲尊君作苦北  
自百年恒跡乃致峻責固足下遺之矣昨覩災詔令

人驚恐誰其召之獨遺主上之憂孤臣萬淚無地可  
着閩吏至爲言春三月勁夷二千直抵閩省焚千家  
滿載而去乾坤生事竟作何狀鄙人稍稍可舟卽渡  
江一覲家君便束衣南下川塗隔絕音告漸踈所幸  
者朝夕子與及武夷諸君不大落莫子鱗稍足自慰  
明卿又卧白鹿洞中書來意氣更可憐耳使者促歸  
且方寸中俱爲群盜所據不得出片語往報聊附此  
申謝放逐之人何所稱賀遠謝故人祇增太息情長  
詞簡不盡區區相見未期強殮自愛

又

夏中蓬萊之使旣歸則子與召我有華陽之役相與  
高醉白雲中凡三四日各得詩二十餘章蓋自貞白  
先生以來稱奇邁矣每一停盃放歌何嘗不念足下  
及李吳二生也旣別子與卽展謁家大人於金陵稅  
駕白鷺洲者兩朔燕磯牛首雨花諸臺時以斗酒臨  
之天風北來念足下方飲馬東海耳九日始得整輿  
向閩采石懷李青山憶謝望齊雲登釣臺十月入武  
夷夢足下握手謔贈覺而悲之一視吏事便亟亟折



腰生平意氣蕭瑟都盡每不自堪輒欲掛冠去聞去  
齊幾六七千里亡論握手卽欲一書何可得哉昨有  
齊周督儲 璽書者自稱足下之使進問亦稍能言  
之謹附尺楮往訊斷事君來謁尚憶足下與我談之  
此卽我兩人郵也使去急不得作于鱗書足下爲我  
致聲何可負我二華不酬也開府公小札奉托之健  
兒

報徐子與

子與足下僕與足下交至驩天下莫不聞也別足下

一年矣迺不能馳一价奉訊足下吳卿移書讓僕謂  
僕以山林自驕足下豈亦有此謂乎秋中辱使惠之  
以書萬里長思頓解復結矣僕以今夏卜築湖南羽  
扇暑巾高卧明月客舍長簫被以采蓮之曲極恨不  
與足下同之也元美秋中過我草堂把盞狂呼猶作  
長安中態四顧諸君不在重自傷念于鱗竟以守出  
迺得闢園讀書元美言于鱗于僕謂其長揖不拜官  
長也斯鱗哉斯鱗哉梁卿落莫山中竟無音耗僕深  
思之常蘇蘇隕涕茂秦近復何狀吾輩尚壯此君白

髮種種矣吳卿還楚過廣陵迺不顧我祇以詩寄我  
又大讓我可恨足下以書去爲僕一謝焉進使者問  
知兄嫂諸息俱亡恙尊公起居健更爲足下大喜使  
復至甚勞具言奉報用謝踈濶歲暮在客霜雪凄甚  
幸謝故人努力自愛

又

便來旣強起書卷題短札與之投筆危坐今昔並起  
懷我二三兄弟懽悰狂語佳話奇篇一一盡爲涕泪  
我輩情深蓋自天地以來一邁耳二君日遠猶得登

暮半途忘其離索獨使我日折腰諸貴人前鬱鬱之  
懷誰與爲語生非金石堪此侵鑠足下念我至甚何  
以策我稱病掛冠長策短笠訪足下於天目之東因  
而西遊白鹿而與吳生策之上也其次則外補一二  
暫爲妻婦餽粥計又不然則仲連有蹈海之節僕將  
躡屩而從焉情長塗短輒爲足下效其區區足下其  
憐察之

又

別來半載僅得足下二紙每啟函輒泪淫淫下七月

間緘一書數詩松江舊吏往候足下雖在姑孰計亦  
能西來相見矣讀足下諸篇悲壯奇爽大快人意每  
一相思輒爲披弄則亦稍慰于鱗竟得關中椽王生  
大不愜于貴臣幾禍已乃差解得戎使去足下雖困  
刁筆平孰與明卿困每一念至則欲裂冠而走我輩  
數人大不理于貴臣之口恐足下與僕俱不免作吳  
生狀也其說頗長不欲爲足下誦之恐足下大恐昨  
爲足下賦金山大有奇特古劔二華匡廬諸篇僕之  
爲諸君作語至矣非諸君顧不足當僕語也足下登

金山月明酒酣取僕語歌之當得山靈夜泣孫張諸  
豎子敢以庸詞辱此山乎一咲一咲

又

郵使歸凡再題尺疏往報重之片詞書來乃責我踈  
遠豈使者俱化爲殷生耶毋怪足下怨苦也僕昨移  
書武夷君日遣白雲候我當事者重達其意乃出僕  
叅議閩藩明月南呼黃鶴來問恐山中之環珮珊珊  
矣朝覩朝牒足下乃又出守汀洲豈亦武夷君意哉  
名山久埋沒群公句中萬古精靈待我二子足下八

月遲我者雪之上登天目泛西湖然後聯舸而進豈  
不可也李王絕無消息明卿時有書來乃得高卧白  
鹿奇矣奇矣僕已勒馬待發口授數字往報握手有  
期不盡覩縷

又

華陽一眺千古失色白雲迷人風雨颯搖山靈見妬  
遂令分袂別後卽稅駕白露洲上兩朔足下旣去無  
可措語惟明月高雲青楓白鴈勸我開尊耳至采石  
得懷白十歌使白起而聽之未必戢心黃鶴也蕪湖

遇鳴野山人山人極道足下其人風采談笑殊可人  
意酒間立綴三章贈之此生狂生乃膽落矣道新安  
登輦嶺萬峯亂插大快耳目出嚴陵爲嚴陵一賦今  
且至武夷矣不得與足下尋九曲而醉焉奈何哉半  
載江山遂有鴻鵠之志今又逐逐折腰矣當令華陽  
諸君謂我輩何人也明當謁武夷君謀焉輿中草絨  
餘棕待面

又

塗中累札往報望日抵省卽島寇揮戟四野破福清

圍鎮東大將且南冠北去日從諸大夫抱關思足下  
碧雲洞真在天上正仗策臨戎使者持緘書至開讀  
之冷然濯我清風哉鎮東之圍益急而福清長樂惠  
安同安之間無非賊壘温州之賊七千餘今且逼福  
寧矣省中止廣兵二千驕不可使鄉戎者強則黨賊  
弱者善犇天下事不知作何狀耳汀雖有盜當不廢  
足下嘯歌使歸附報明卿書致上廬山之使歸未

又

前二日平子之使便附訊起居健兒奉書至乃知

足下之勞於戎事甚矣且足下空國而來使山賊猝  
起何以應之前督府下檄時急不可以請今稍靖矣  
當具言汀不可亡兵狀請罷其聽調二千如何昨所  
擒賊者咸閩卒也乃廣兵二千餘人日食省中驕不  
可制白日攫市虜婦女稍詰之則抽刃相向乃賊至  
又不肯發一矢也僕談斯事怒髮上指冠乃今覩閩  
卒成功首稍稍垂矣而歲費帑金蓋三萬可恨哉僕  
意言之督府請罷去廣兵而歲捐萬金練賴兵二千  
人戍省其可恃蓋不下廣兵且延邵之間其悍夫猛

士盡可兵也足下其以爲何如同安雖幸未陷然亦未能安枕矣草草布臆炎甚自愛

又

累奉遠牘知足下之爲閩慮至深也前使者以軍書至僕卽進言督府卽轉檄汀兵還汀矣督府雖罷遣歸猶欲立之帥長亡事則農有警卽舍耒而刃僕因極言汀不可一日亡兵兵餉復匱乃云非卽欲餉之姑羈之耳且言二千石善爲理也足下其竟如何哉武平報山寇復起信有之則汀何待焉吾輩旣不能

長驅中原飲馬河洛乃使持戈負矢周旋群醜羞談之矣海寇大都多華人華人狡善詒夷福清之陷也蓋華人先其夷於睨睥間守陴者覲其夷也遂驚而逸旣陷華人乃又先之詒夷於獄此帑藏也夷遂呼其類數千人闢門以入見其纍纍然繫者以爲守帑卒也詰帑金何在不得則縛而刃之乃華人已群入藏中負其數萬金走矣夷窮亡獲逐環山而掠卽販絮腐糈亦喜而內之囊中人言此何窶而貪也不知華人負之矣及其敗也其俘咸夷輩無一夫被劊者

華人無論負其國乃又負夷今且各持其金驕其妻  
肉嬉遊閭巷矣此何稱編民哉爲今之策  
先策華人夷可不策而定不爾者亂無已時也而策  
華人卽僕亦罔知策所從出足下謂勿詰其漁商者  
誠是也但今之漁商者有司何能詰之詰亦亂不詰  
亦亂其意以爲漁商者猶勞且費也不漁不商不勞  
不費持大刀走數十里便可得黃金數斤狎美嬾人  
數十揚揚而去我兵畏睨豈不愉快得意哉此華人  
之心卽蘇張復出不能移易之矣而欲一有司召號

之僕固知其難也假使諸葛司馬諸君復出不知亦  
作何狀足下所使代謁督府者僕命之察之群屬咸  
無一人至者惟足下裁之吳生何詩寄我一讀

又

歸自建安則有護軍之檄矣足下乃又以使來足下  
文顧不文乃令不文文哉重幣兼之箠臺又何說焉  
休沐信宿冒暑而馳宜怨不者寔以足下故奪之我  
二人握手碧雲洞時以爲斯地無復會理今三月耳  
乃又得坐崑崙片石嘯味也豈不天作之合哉鄙人

督蒼梧軍西也其人威虎而戟日夜憂之亡策唯厚  
勞其酋長酋長喜遂戢其下不敢掠塗然亦其塗之  
人徙其鷄犬孥孺而內之他所故免足下幸傳檄塗  
屈者毋縱鷄犬不收毋不能一時去其孥孺以爲護  
軍使者憂也今將樂矣再五日入汀足下其勅徐去  
人煮天目茗薜待我寄明卿二詩奇哉奇哉每讀足  
下寄吳生詩且佳且多恨不得作白鹿逐客也足下  
上計事歸問之趙伯趙伯云業已議汀大夫入計矣  
悔不早言之賴府漳道咸有留詞便須上書以請不

得之此則得之彼僕亦以爲免上計便蕭生幸卽命  
之恐生他端爲僕累也咫尺不悉言秋炎自愛

又

先是二日二健兒歸付之尺牘是時群酋戢不掠已  
發書乃聞其在順昌道中要葉氏姬於輿中而群辱  
之已又掠其鬢金以去其姬名家女也媿觸石而斃  
僕聞之怒髮上指冠已檄從事廉狀以請其酋長亦  
恐恐待罪僕誠不能愛此一官而令匹夫匹婦之仇  
不報也爲此星馳而兩五鼓抵歸化目不交睫者兩



夕失蓋恐塗氓不卽徙其孥孺鷄犬故家至而墜徙  
之蕭生及從事來兩辱書知足下之遲我深也僕卽  
不念碧雲獨不念足下哉且群酋不出瑞金僕之轅  
未可東也其勞軍諸例已具公牒中西報十日矣咫  
尺握手心神飛越

又

樵川遺健兒入汀後二日抵順昌聞足下棘闥之檄  
此何足云顧沾沾喜者以握手之難也故事聘博士  
三關則守臣護入之旣已延平而過臺復檄往杉關

入諸博士馬蹄不穿難矣如此宦情奈何令鄙人  
之足下建寧之役不必特馳月晦便謁過朔趨闥至  
順也前議倘諧所遣偕使其抵省僕當具楮待之鄙  
事大勞足下然非我兄弟一體者安可措片語也李  
司勳書幸付長汀君其護吏回仍取報書寄我

又

足下之枉辱敝署也卽如崑崙之上遇羨門焉駐馬  
數卮竟爲衙官促去何物浮名乃能籠人如此意忙  
然甚也已乃從臺史廟謁遂留齋沐庠中罷祀鷄鳴

宗方城尺牘卷六  
矣晨起軋軋又從諸大夫折腰也欲啟鑰展謁足下  
則足下能一出乎左國二種偶涉鄙筆幸足下藏之  
左逸其一錯麓中當獲足之也

又

胡床衾語寔平生所缺一卮便別乃令心恹恹並西  
矣居數日卽以戎事復出塗中得玉華二書讀之淚  
下僕念足下豈殊足下哉頗使君大自意氣其爲我  
道足下高義口津津不收也又得讀黃花素秋之篇  
擊缶而歌颯然風雨豈足下登碧雲時乎盜屯紫雲

臺上僕因鼓行而西駐馬歸化者五日矣健兒持江  
書至大誇我滴水之奇遂不能夜營營至曙則携揭  
生徃眺怪奇哉怪奇哉不知天地間乃有此揭君謂  
足下大醉洞中一日不能去則何不令我二人共卮  
乎夜歸刻燭得一短記以貽足下足下如以爲可登  
之山則石焉亦使千載之下知吾二人與此山也碧  
雲二詩工者甚精朝斗得亡有怨言否知足下有上  
杭之役故未遣訊而陽從事報足下尚旬外戒塗且  
取道於越大喜今以自病且賊遁不可久食有司米

遂還延平卽再旬定與足下一醉而別也勿負勿負  
顏使君遣其使西幸善視之

又

延平寓一書往遲意五日卽携孥出守郡也而因與  
足下爲劔津之飲不謂至省穆伯卧病二臺遂檄視  
司且是月錄武復棘棘累日方與顏使君謀馳之延  
平而同安報夷艇至矣計足下當以望日發汀恐遂  
不能出靚節鉞徒令此心萬折也且足下旣去而僕  
之鬱鬱竟誰與語言之涕淚滿衣矣足下過九龍而

不見僕得無戚戚動念乎謹遣一介代候于郊萬里  
長塗兼以霜雪唯足下慎與自愛鄙人心摇摇而  
北無已時也洒淚投函莫知所云

又

聞足下北轅十日矣長安車馬雲翔而舉目無一知  
已者足下得無短氣乎昔顧華玉以開封謁帝獻吉  
諸公祖道陳詩而朱升之報績遠亦有章園別紀足  
下何人哉乃不得並二三子游也萬里之外令人快  
快耳臺使便附訊願言加飯以慰遠臆

又

隔旬臬吏有事於越附尺牘命之天目訊足下書及家大人訊語啟函讀乃知足下有顛使於金陵而家大人數數感足下高誼無已時也足下念我戎旃戎旃卽苦顧不若二三兄弟放逐驚憂種種甚也每一念之不覺泣下莽莽宇宙安所投足哉足下以大夫人故不出僕不敢謂足下語非也家大人以倭故近日買宅鳳臺之東將定居焉而一嬾諸所從者行將盡歸之則僕之進止便也奈何以一學椽而負此千

古足下以爲如何元美處日夜念之無一介可任黃少府疾足謹遣之代訊足下足下如以爲可任則北之且今歸塗東之齊一訊李生也昨覩王生病䟽痛心哉痛心哉百凡足下裁之

又

渡淮報前驅且至不得再握手是造物忌之矣抵燕見二生攘臂累夕以言相詛僕謂掄才計筭諸君必不得久任人間諸君事當並以累僕也舍人因起毆幾折吾齒束帶投刺甚怨見二生則喜每聚必談足

下足下雖遠左右呼之恒若狂奴在側也攜李兵亂  
足下歸值之足下自愛毋爲諸夷所苦舍人則有喜  
色奈此狂者何途間得舟中一首附去餘不得書近  
稿雖爲鄭生竊去尚憶書寄我

又

屢屢使命裨將來又辱書抱讀臨風碧雲秋色侵人  
矣足下須命毛穎先生數百呌石上待我二人題石  
也群酋數日頗戢又費郡中牛酒以爲父老憂使君  
有罪哉漳南君旣未到干旌偏不勞遠出遲我碧雲

可矣

報吳明卿

與足下別長遠矣去夏真丞送一書握讀數過愴然  
增情偃卧空山函報亡路及元美至奉一書一詩乃  
知使節還楚過門不入祇有愧嘆洞庭浩渺音書益  
難計今秋使節過揚必得一覲遣使江滸往遲前驅  
元美書來乃謂足下擁二姬從西北徑趨上國令我  
惆望彌時潛然淚下關山迢遞羽翼參差足下讓僕  
以山中自驕寃米寃矣射陽湖上遇子與謂足下詩

思益雄恨不能卽夕見足下握手大呼命楚妃烹鮮  
進醴爲荆高飲也今已整輿上塗卽可北鄉思君數  
詩往省足下亦必有相懷者

又

日與二三子燕市遊手足耳目也昨悲王生去尚得  
二子破之今二子又去矣僕卽悵悵也 措語乎前  
視足下邸中一上騎便覺寒氣射人至 則百骸如  
火狂惑昏憤時作夢中語方其亂時不知足下去也  
稍定乃知之則心痛欲割耳再一日疆視徐生旣而

復困對鏡日癩咄咄不樂恐遂爲真虛 所苦徐生薄  
命又天其子含淚登輶去住增怨昨也 馬西城忽  
欲投刺足下旣而念足下已東輒淚 下掩面反  
走足下日就江湖形骸漸放鄙人孤遊 莽踪跡可  
憐握手何時傷心無已昨已移書舍弟 訊其出迓于  
旋射陽之湖西三君共棹而東醉我百花洲上則薛  
蘿楊柳將分華割榮而快焉病中據案申悃展筆屢  
投凄悵無極前途自愛時惠德音

又

子與行倚病題數字往報投筆決灑不知所云及使  
歸奉七日手書啟封黯淡至不能卒讀足下以郊行  
不見僕爲恨豈知僕當是時乃憤憤不知足下去也  
足下去尚得子與一二晤言今子與又去矣孤坐而  
悲萬念並起躍馬出署于復何之或有美饌名醞蔽  
之誰待鬱抱日起孰爲宣之驚人佳句其誰誦而歌  
焉俯仰傷懷寸心萬折旣而自解借使僕與二三子  
隔千百世而生如左馬李杜者則亦何得二三子以  
爲懽乎且長安中貴人不少吾疆以二三子視之亦

期願言自愛

又

四月出薊留尺牘荒詞劉武庫邸中計楚騎日南可  
扣白鹿也今歲暮矣足下曾無片言隻字訊我豈忘  
我哉夏中還廬幾爲島奴所苦秋渡江遇子與共醉  
華陽三日已又登無磯眺鳳臺稅駕白鷺之洲呼月  
采石之巔西睇楚雲心神飛越十月抵武夷掃石門  
蘿放歌長嘯青楓萬里白雲滿衣苦憶狂奴寸心如  
墜耳子與日坐烽燧中却有佳句元美贈我長語奇



麗動人足下久負武夷詩不報何也吾將遣白龍而問之江上聞足下量移南康大令人生妬豈白鹿遂作君家物也昨有人言足下與王督學徧廬山游二美並藻江山生色可使遠人得聞乎貴鄉姚文學奉其尊人北歸便訊起居更數日僕與子與有顓使於足下其束筥草而待焉

又

別足下日月頗遠顧時時念之至於登眺江山雲霞莽互不得足下楚歌放之爲念更深矣然足下坐廬

山中卽得五老白鹿日相酬酢恐未盡解足下語也則足下之念如何僕之入閩也日手戈戟從健兒游然坐卧青山差極快意子與相隔千里雖阻面譚郵書甚勤足慰離索獨足下與李王二子經年不得片語然二三君子豈容一日忘我哉昨貴鄉姚文學歸附尺牘荒詞往訊茲遣乃子與及僕顓使也敬問楚客楚妃楚公子亡恙其洞中詩自春以往者悉函授使者歸也卽與足下枕石而醉不殊矣玉華一篇用寄遠臆武夷片碣遲君久矣惠我德音慰其饑渴

報梁公實

去夏與足下握別寺上心旌共往凡兩得途中手續  
把誦沾衣足下別去一月又爲別元美元美既去僕  
病十月上書幸 主上恩賜俾得就醫故國今故國  
草廬已暮春矣憶昔並馬長安鳴珂受簡一時騷壇  
直追漢魏真千載奇觀也嘉會不常盛圖難再謝以  
春歸子以夏去元美與僕相繼出都獨于麟子與明  
卿落落京邑海內豪傑能復幾人一歲之間萍分雲  
散良可念也于麟五馬之請當在暮秋而子與上疏

分曹留中不報豈惟聚散多端岐途偃蹇彼此固且  
甘之矣足下本以煙霞之徒得遂初服採芝鍊石何  
所不成矢爲文詞益復凌虛駕空不可羈縻僕常言  
人世祇有二道上焉者乘青雲弄紫霞而次則宏詞  
麗句照耀今古名並日月莫得而掩焉足下將無兩  
得之耶僕之爲心足下所知謝客巖居不敢自棄於  
斯道以負知己近日採藥深山遇異人授以大還之  
術意將文詞之業大就然後躡屐而從焉山中偶值  
貴鄉人附此往訊用申前盟茂秦南來則僕有浪游

五嶽之興羅浮雖遠幸為我選石相待也臨風惓惓  
不知所云

吳大城印



